

ЦАХИМ ОРЧИН АШИГЛАН СОНГУУЛИЙН СУРТАЛЧИЛГАА ЯВУУЛАХ, ТҮҮНД ХЯНАЛТ ТАВИХ ЖУРАМ

Нэг. Ерөнхий зүйл

- 1.1. Энэхүү журмаар Монгол Улсын Их Хурлын сонгуулийн тухай хууль (цаашид “Сонгуулийн хууль” гэх)-ийн 39 дүгээр зүйлийн 39.2.7 дахь заалтад заасан цахим орчин ашиглан ээлжит, ээлжит бус, нөхөн сонгуулийн сурталчилгаа явуулах болон түүнд хяналт тавихтай холбогдох харилцааг зохицуулна.
- 1.2. Сонгуульд оролцож буй нам, эвсэл, нэр дэвшигч болон тэдгээрийн сонгууль эрхэлсэн байгууллага нь цахим орчинд сонгуулийн сурталчилгаа явуулахдаа сонгуулийн хууль тогтоомж болон энэ журмыг дагаж мөрдөнө.
- 1.3. Үүрэн холбооны үйлчилгээ эрхлэгч, интернэтийн үйлчилгээ эрхлэгч болон цахим орчны үйлчилгээ эрхлэгч нь сонгуулийн хугацаанд энэ журмын 1.2-т заасан хууль тогтоомж, журмыг дагаж мөрдөнө.
- 1.4. “Цахим орчны үйлчилгээ эрхлэгч” гэдэгт цахим хуудас, цахим хэрэглүүр /аппликэйшн/, платформ, цахим орчин ашиглаж контент¹-ийг олон нийтэд хүргэх үйлчилгээ үзүүлэгчийг ойлгоно.
- 1.5. “Нэр дэвшигчийн болон нам, эвслийн өөрийн цахим хуудас” гэдэгт нэр дэвшигчийн өөрийн болон улс төрийн нам, эвслийн эзэмшиж, ашигладаг вэб сайтыг ойлгоно.
- 1.6. “Цахим орчин дахь олон нийтийн сүлжээний цахим хуудас” гэдэгт цахим орчин дахь олон нийтийн сүлжээний цахим хаяг /пэйж хуудас, профайл/-ийг ойлгоно.
- 1.7. “Бусад цахим хуудас” гэж цахим орчны үйлчилгээ эрхлэгчийн удирддаг, эсхүл эзэмшдэг вэб сайтыг ойлгоно.
- 1.8. “Эрх бүхий байгууллага” гэж Сонгуулийн ерөнхий хороо, цахим хөгжил, харилцаа холбооны асуудал эрхэлсэн төрийн захиргааны төв байгууллага, тагнуулын байгууллага, цагдаагийн төв байгууллага болон шударга өрсөлдөөний асуудал эрхэлсэн төрийн захиргааны байгууллага хамаарна.
- 1.9. Тус журмаар зохицуулаагүй харилцаанд Монгол Улсын Их Хурлын сонгуулийн тухай хууль, Харилцаа холбооны тухай хууль, Зөрчлийн тухай хууль, Зөрчил шалган шийдвэрлэх тухай хууль, Эрүүгийн хууль, Эрүүгийн хянан шийдвэрлэх тухай хууль, Хүний хувийн мэдээлэл хамгаалах тухай хууль болон бусад холбогдох хууль тогтоомжийг баримтална.

Хоёр. Цахим орчинд сонгуулийн сурталчилгаа явуулах, хяналт тавихад баримтлах зарчим

- 2.1. Сонгуулийн үйл ажиллагааны ил тод байдлыг хангах зарчмын хүрээнд сонгуулийн сурталчилгааг цахим хуудсанд байршуулахад нам, эвсэл, нэр дэвшигчийн мэдээлэл /нэр, далбаа, таних тэмдэг, сонгуулийн уриа/-ийг олон нийтэд ойлгомжтой, нээлттэй ил тод харагдахуйц байдлаар тэмдэглэсэн байна.

¹ Өргөн нэвтрүүлгийн тухай хуулийн 4.1.8."контент" гэж харилцаа холбооны сүлжээгээр дамжиж байгаа үг, дуу, тэмдэг, дохио, текст, зураг, график, хөдөлгөөнт дүрс бүхий бүх төрлийн мэдээ, мэдээллийг электрон хэлбэрт хувиргасныг;

2.2. Сонгуулийн тухай хууль болон энэ журамд заасны дагуу бүртгүүлээгүй цахим хуудсыг ашиглан сонгуулийн сурталчилгаа явуулахгүй.

2.3. Бүртгэлтэй цахим хуудас нь зөвхөн Сонгуулийн тухай хуулийн 48.3-т заасан сонгуулийн сурталчилгаа явуулах эрх бүхий этгээдийн хийсэн сонгуулийн сурталчилгааг нийтэлнэ.

Гурав. Сонгуулийн сурталчилгаанд ашиглах цахим хуудасны бүртгэл

3.1. Нам, эвсэл, нэр дэвшигч нь өөрийн тус бүр нэг цахим хуудас, цахим орчин дахь олон нийтийн сүлжээний цахим хуудас сонгуулийн сурталчилгаанд ашиглах тохиолдолд пэйж хуудас, профайл хаяг тус бүр нэгийг хуульд заасан хугацаанд багтаан аймаг, нийслэлийн сонгуулийн хорооны бүртгэл хариуцсан ажилтанд энэ журмын Хавсралт 1-д заасан маягтын дагуу бүртгүүлнэ.

3.2 Энэ журмын 3.1-д заасан цахим хуудас нь дараах шаардлагыг хангасан байна:

3.2.1. Сонгуулийн тухай хуулийн 47.1.1-д заасан нам, эвсэл, нэр дэвшигчийн вэб сайт нь нам, эвсэл, нэр дэвшигчийн мэдээлэл */нэр, далбаа, өөрийн зураг, таних тэмдэг, сонгуулийн уриа/-ийг* олон нийтэд ойлгомжтой, нээлттэй ил тод харагдахуйц байдлаар нүүр хуудсандаа харуулсан байна.

3.2.2. Сонгуулийн тухай хуулийн 47.1.2-д заасан нам эвслийн цахим хуудас нь нам эвслийн нэрийг илэрхийлсэн утга бүхий нэр, бэлгэ тэмдэг бүхий зурагтай байх бөгөөд нам, эвсэл, нэр дэвшигчийн мэдээлэл */нэр, далбаа, таних тэмдэг, сонгуулийн уриа/-ийг* агуулсан байна.

3.2.3. Сонгуулийн тухай хуулийн 47.1.2-д заасан нэр дэвшигчийн цахим хуудас нь нэр дэвшигчийн овог нэрээр нэрлэсэн, өөрийн зурагтай байх бөгөөд нам, эвсэл, нэр дэвшигчийн мэдээлэл */нэр, далбаа, таних тэмдэг, сонгуулийн уриа/-ийг* агуулсан байна.

3.3. Энэ журмын 3.2-т зааснаас бусад цахим хуудас болон цахим орчин дахь олон нийтийн сүлжээний цахим хуудас нь сонгуулийн сурталчилгааг явуулах тохиолдолд Харилцаа холбооны зохицуулах хороонд энэ журмын Хавсралт 2-т заасан маягтын дагуу бүртгүүлнэ.

3.4. Энэхүү журмын 3.3-т заасан цахим хуудас нь сонгуулийн сурталчилгаа эхлэх өдрөөс өмнө Харилцаа холбооны зохицуулах хороонд бүртгүүлнэ.

3.5. Бүртгэлийн хуудсыг бүрэн гүйцэд, үнэн зөв бөглөж, ирүүлэх бөгөөд мэдээллийн үнэн зөв байдлыг бүртгүүлэгч этгээд хариуцна.

3.6. Аймаг, нийслэлийн сонгуулийн хороо нь нам, эвсэл, нэр дэвшигчийн сонгуулийн сурталчилгаанд ашиглах цахим хуудасны бүртгэлийн мэдээллийг бүртгэл хийснээс хойш нэг хоногийн дотор Харилцаа холбооны зохицуулах хороо болон Сонгуулийн ерөнхий хороонд цахим хэлбэрээр хүргүүлнэ.

3.7. Нам, эвсэл, нэр дэвшигчийн бүртгүүлсэн цахим хуудасны жагсаалт болон цахим орчны үйлчилгээ эрхлэгчийн бүртгүүлсэн цахим хуудасны жагсаалтыг Сонгуулийн ерөнхий хороо болон Харилцаа холбооны зохицуулах хороо нь өөрийн албан ёсны цахим хуудсанд сонгуулийн жил дуусах хүртэл хугацаанд байршуулна.

Дөрөв. Эрх бүхий байгууллагын чиг үүрэг

4.1. Сонгуулийн хууль тогтоомжийн хэрэгжилтийг цахим орчинд шуурхай хангуулах ажлын хүрээнд холбогдох эрх бүхий байгууллагууд хамтран ажиллана.

4.2. Эрх бүхий байгууллагууд нь хамтран ажиллах эрх бүхий албан тушаалтны овог, нэр, албан тушаал, хөдөлгөөнт болон суурин утасны дугаар, цахим шуудангийн хаягийн мэдээллийг гаргаж, сонгуулийн сурталчилгаа эхлэх өдрөөс 7 хоногийн өмнө харилцан солилцоно.

4.3. Цахим хуудсанд нийтлэгдсэн сонгуультай холбоотой мэдээ, мэдээллийг хянан шалгасан эрх бүхий байгууллага нь хууль бус үйлдлийг тогтоож, Сонгуулийн тухай хуулийн 47.7-д заасан арга хэмжээг авах шаардлагатай гэж үзсэн тохиолдолд Харилцаа холбооны зохицуулах хороонд шийдвэрийг албан бичгээр нэн даруй хүргүүлнэ.

4.4. Энэ журмын 4.3-т заасан шийдвэр бүхий албан бичгийг цахим болон хэвлэмэл байдлаар хүргүүлнэ.

4.5. Эрх бүхий байгууллагын шийдвэр бүхий албан бичиг нь хэлбэрийн болон агуулгын дараах шаардлагыг хангасан байна. Үүнд:

4.5.1. Шийдвэр гаргасан эрх бүхий байгууллагын нэр, хаяг, эрх бүхий албан тушаалтны нэр, гарын үсэг, тамга тэмдгээр баталгаажсан байх ба албан бичгийн огноо, дугаарыг тодорхой заасан байх;

4.5.2. Шийдвэр гаргасан шалтгаан, нөхцөл байдал, хуулийн үндэслэл, зүйл, заалтыг тодорхой тусгасан байх;

4.5.3. Хууль зөрчсөн зар сурталчилгаа, мэдээ, мэдээллийг байршуулсан цахим хаяг, цахим холбоос, хэвлэмэл баримт зэрэг шаардлагатай баримтыг хавсаргах.

4.6. Энэ журмын 4.3-т заасан шийдвэр бүхий албан бичиг нь уг журмын 4.5-д заасан шаардлагуудыг хангаагүй тохиолдолд Харилцаа холбооны зохицуулах хороо нь шийдвэр бүрэн бус байгаа талаар эрх бүхий байгууллагад хариу мэдэгдэнэ.

4.7. Эрх бүхий байгууллагаас ирүүлсэн шийдвэр бүхий албан бичиг нь журмын шаардлагыг бүрэн хангасан тохиолдолд Харилцан холбооны зохицуулах хорооноос энэхүү журмын 6-р бүлэгт заасан арга хэмжээг зохион байгуулна.

4.8. Харилцаа холбооны зохицуулах хороо нь авсан арга хэмжээний талаарх мэдээллийг шийдвэр гаргасан эрх бүхий байгууллагад цахимаар мэдэгдэнэ.

4.9. Энэхүү журмын хүрээнд авсан арга хэмжээний талаарх тайланг тухайн жилдээ багтаан Сонгуулийн ерөнхий хороо болон Харилцаа холбооны зохицуулах хорооны цахим хуудсаар дамжуулан олон нийтэд ил тод, нээлттэй мэдээлнэ.

Тав. Бусад холбогдох этгээдийн эрх, үүрэг

5.1. Үүрэн холбооны үйлчилгээ эрхлэгч болон интернэтийн үйлчилгээ эрхлэгч нь дараах үүрэгтэй:

5.1.1. сонгуулийн хууль тогтоомжийн хэрэгжилтийг хангах үүднээс гүйцэтгэх удирдлага болон сонгуулийн сурталчилгааны хугацаанд хамтран ажиллах техникийн багийн гишүүдийн овог, нэр, албан тушаал, хөдөлгөөнт болон суурин утасны дугаар, цахим шуудангийн хаягийг Харилцаа холбооны зохицуулах хороонд бүртгүүлэх;

5.1.2. сонгуулийн сурталчилгаа эхэлснээс сонгуулийн санал авах өдрийн дараах өдөр хүртэл хугацаанд энэ журмыг хэрэгжүүлэхтэй холбоотой үйл ажиллагааг тасралтгүй явуулах нөхцөл бололцоогоор хангах;

- 5.1.3. Сонгуулийн тухай хуулийн 47.8, 47.11 дэх хэсэгт заасан чиг үүргийн хэрэгжилтийг хангуулах хүрээнд сонгуулийн сурталчилгааны хугацаа эхлэхээс өмнө туршилтыг хийх, техник технологийн бэлэн байдлыг хангасан байх;
- 5.1.4. интернэтийн үйлчилгээ эрхлэгч нь зөрчилтэй домэйн нэрийн жагсаалт /black-list.mn/-ыг өөрийн сүлжээнд даруй хязгаарлах;
- 5.1.5. зөрчилтэй домэйн нэрийн жагсаалтыг сонгуулийн сурталчилгаа эхэлснээс сонгуулийн санал авах өдрийн дараах өдөр хүртэл хугацаанд 4 цаг тутамд шинэчлэх бөгөөд шаардлагатай тохиолдолд нэн даруй шинэчлэх;
- 5.1.6. интернэтийн үйлчилгээ эрхлэгч нь домэйн нэрийн сервер (Domain Name Server)-тээ болон сүлжээний хамгаалалтын төхөөрөмж (Firewall)-дөө "www.black-list.mn" домэйн нэрт харгалзах АйПи(IP) хаягаас ирэх домэйн нэрийн асуулга, хүсэлтийг зөвшөөрөх, хариулах боломжийг бүрдүүлсэн байх;
- 5.1.7. интернэтийн үйлчилгээ эрхлэгч нь интернэтийн үйлчилгээнд ашиглаж буй домэйн нэрийн серверүүд (Domain Name Server)-ийн АйПи (IP) хаягууд болон хариуцан ажилладаг ажилтны овог, нэр, албан тушаал, цахим шуудангийн хаяг, утасны дугаар зэрэг мэдээллийг Харилцаа холбооны зохицуулах хороонд бүртгүүлэх;
- 5.1.8. Сонгуулийн тухай хуулийн 47.7-д заасан эрх бүхий байгууллагуудад шаардлагатай мэдээллийг боломжит хэлбэрээр гаргаж өгөх, технологийн болон мэргэжил арга зүйн дэмжлэг туслалцааг үзүүлэх;
- 5.1.9. Харилцаа холбооны зохицуулах хорооноос шаардсан мэдээллийг тухай бүр гаргаж хүргүүлэх;
- 5.1.10. хэрэглэгчийн нэг удаагийн холболт дахь бүх хандалт нэг гадаад АйПи (IP) хаягаар дамжих боломжийг бүрдүүлэх бөгөөд харгалзах /гадаад, дотоод/ хаягуудын мэдээллийг 1 сарын хугацаанд хадгална.
- 5.2. Цахим орчны үйлчилгээ эрхлэгч нь дараах үүрэгтэй:
- 5.2.1. сонгуулийн сурталчилгааг Сонгуулийн хууль болон энэ журамд заасны дагуу явуулах;
- 5.2.2. энэ журмын 6.3-т заасан арга хэмжээг хэрэгжүүлэх, гүйцэтгэх техник, технологийн боломжийг хангасан байх;
- 5.2.3. нам, эвсэл, нэр дэвшигчийн сурталчилгааг сонгуулийн сурталчилгаа дууссан өдрөөс сонгуулийн санал авах өдрийн дараах өдөр хүртэл хугацаанд түр хязгаарлах буюу сонгогчдод харагдахгүй болгох технологийн арга хэмжээ авах;
- 5.2.4. сонгуулийн сурталчилгаа хийсэн тохиолдолд сонгуулийн сурталчилгааг захиалсан этгээд болон сонгуулийн сурталчилгааны төлбөрийн талаарх мэдээлэл агуулсан тайланг сонгуулийн санал хураах өдрийн дараа өдрөөс хойш 30 хоногийн дотор Сонгуулийн ерөнхий хороонд хүргүүлэх;
- 5.2.5. домэйн нэр ашиглан мэдээ мэдээллийг хэрэглэгчид хүргэж буй бүх төрлийн вэб сайт нь сонгуулийн сурталчилгаа явуулахдаа сэтгэгдэл бичигдэхгүй тохиргоотойгоор нийтлэх;
- 5.2.6. Харилцаа холбооны зохицуулах хорооноос шаардсан мэдээллийг тухай бүр гаргаж хүргүүлэх.
- 5.3. Сонгуульд оролцож буй нам, эвсэл, нэр дэвшигч нь дараах үүрэгтэй:

5.3.1. сонгуулийн сурталчилгааг Сонгуулийн хууль болон энэ журамд заасны дагуу явуулах;

5.3.2. нам, эвсэл, нэр дэвшигч нь цахим хуудас болон цахим шуудангийн мэдээллээ аливаа халдлагаас урьдчилан сэргийлэх, мэдээллийн аюулгүй байдлыг хангах талаар арга хэмжээ авч хэрэгжүүлэх;

5.3.3. нам, эвсэл, нэр дэвшигч нь сонгуулийн сурталчилгаанд ашигласан цахим хуудсыг сонгуулийн сурталчилгаа дууссан өдрөөс сонгуулийн санал авах өдрийн дараах өдөр хүртэл хугацаанд түр хязгаарлах буюу сонгогчдод харагдахгүй болгох технологийн арга хэмжээ авах.

Зургаа. Сонгуулийн сурталчилгааны хяналтын горим

6.1. Цахим орчин дахь сонгуулийн сурталчилгаатай холбоотой өргөдөл, гомдлыг цагдаагийн байгууллага, тагнуулын байгууллага, шударга өрсөлдөөний асуудал эрхэлсэн төрийн захиргааны байгууллага, цахим хөгжил, харилцаа холбооны асуудал эрхэлсэн төрийн захиргааны төв байгууллагад гаргана.

6.2. Энэ журмын 6.1-д заасан эрх бүхий байгууллага нь цахим орчин дахь сонгуулийн сурталчилгаатай холбоотой өргөдөл, гомдлыг хүлээн авч холбогдох хууль тогтоомжийн дагуу хянан үзээд энэ журмын 4.5-д заасан шаардлага хангасан шийдвэрийг Харилцаа холбооны зохицуулах хороонд хүргүүлнэ.

6.3. Харилцаа холбооны зохицуулах хороо нь энэ журмын 6.2-д заасан шийдвэр бүхий албан бичгийн дагуу дараах арга хэмжээг авах талаар цахим орчны үйлчилгээ эрхлэгчид нэн даруй мэдэгдэнэ:

6.3.1. шийдвэрт дурдсан контентыг устгах, эсхүл хандалтыг хаах, эсхүл түр хязгаарлах;

6.3.2. шийдвэрт дурдсан цахим хаяг, цахим хуудсыг сонгуулийн сурталчилгааны хугацаа дуустал хандалтыг хаах, эсхүл түр хязгаарлах.

6.4. Харилцаа холбооны зохицуулах хороо нь энэ журмын 6.3-д заасан мэдэгдлийг тухайн цахим орчны цахим үйлчилгээ эрхлэгчийн цахим орчин дахь хаяг эсхүл Харилцаа холбооны зохицуулах хороонд бүртгэлтэй цахим шуудангаар хүргүүлснээр мэдэгдсэнд тооцно.

6.5. Зөрчил гаргасан цахим орчны үйлчилгээ эрхлэгч нь энэ журмын 6.3-т заасан мэдэгдэлд дурдсан арга хэмжээг заасан хугацаанд даруй хэрэгжүүлж, хэрэгжилтийн талаарх мэдээллийг Харилцаа холбооны зохицуулах хороонд цахим шуудан, утсаар мэдэгдэж, албан бичгээр хүргүүлнэ.

6.6. Цахим орчны үйлчилгээ эрхлэгчийг олж тогтоох боломжгүй эсхүл энэ журмын 6.4-т заасан арга хэмжээг хэрэгжүүлээгүй бол Харилцаа холбооны зохицуулах хороо дараах мэдэгдлийг цахим орчны үйлчилгээ эрхлэгч, үүрэн холбооны үйлчилгээ эрхлэгч болон интернэтийн үйлчилгээ эрхлэгчид хүргүүлнэ:

6.6.1. тухайн цахим орчны цахим үйлчилгээ эрхлэгчийн Монгол Улсаас хандах хандалтыг сонгуулийн сурталчилгааны дүн гарч дуусах хүртэлх хугацаанд, эсхүл зөрчлийг арилгах хүртэлх хугацаанд түр хязгаарлах;

6.6.2. шийдвэрт дурьдсан хууль зөрчсөн контентыг устгах, эсхүл хандалтыг хаах, эсхүл түр хязгаарлах;

6.6.3. хуульд заасан технологийн арга хэмжээ авах.

6.7. Үүрэн холбооны үйлчилгээ эрхлэгч, интернэтийн үйлчилгээ эрхлэгч болон цахим орчны үйлчилгээ эрхлэгч нь энэ журмын 6.6-д заасан мэдэгдэлд дурдсан арга хэмжээг заасан хугацаанд даруй хэрэгжүүлэх үүргийг хүлээх бөгөөд хэрэгжилтийн талаарх мэдээллийг Харилцаа холбооны зохицуулах хороонд цахим шуудан, утсаар мэдэгдэж, албан бичгээр хүргүүлнэ.

6.8. Харилцаа холбооны зохицуулах хороо нь энэ журмын 6.1-д заасан эрх бүхий байгууллагаас цахим орчны үйлчилгээ эрхлэгчийн зөрчил арилсан талаар шийдвэрийг ирүүлсэн тохиолдолд хандалтыг сэргээх технологийн арга хэмжээг нэн даруй авна.

Долоо. Гомдол маргаан шийдвэрлэх

7.1. Үүрэн холбооны үйлчилгээ эрхлэгч, интернэтийн үйлчилгээ эрхлэгч болон цахим орчны цахим үйлчилгээ эрхлэгч нь иргэн, хуулийн этгээдийн гомдол маргааныг хүлээж авах шуудангийн хаяг, холбоо барих утасны дугаар, цахим шуудангийн хаягийг олон нийтэд ил тод байршуулна.

7.2. Үүрэн холбооны үйлчилгээ эрхлэгч, интернэтийн үйлчилгээ эрхлэгч болон цахим орчны цахим үйлчилгээ эрхлэгч нь хүн, хуулийн этгээдийн гомдол, маргаантай холбоотой асуудлыг өөрийн эрх хэмжээний хүрээнд шийдвэрлэх бөгөөд шаардлагатай бол холбогдох эрх бүхий байгууллагад хандаж болно.

7.3. Үүрэн холбооны үйлчилгээ эрхлэгч, интернэтийн үйлчилгээ эрхлэгч, цахим орчны цахим үйлчилгээ эрхлэгч нь хүн, хуулийн этгээдийн гомдол, маргааныг хэрхэн шийдвэрлэсэн талаарх тайланг сонгуулийн сурталчилгааны хугацаа дууссанаас хойш 30 хоногийн дотор гаргаж, олон нийтэд нээлтэй мэдээлнэ.

Найм. Хариуцлага

8.1. Энэ журмыг зөрчсөн хүн, хуулийн этгээдэд Зөрчлийн тухай хууль болон Эрүүгийн хуульд заасны дагуу хариуцлага хүлээлгэнэ.

СОНГУУЛИЙН СУРТАЛЧИЛГААНД АШИГЛАХ ЦАХИМ ХУУДАСНЫ БҮРТГЭЛ
(Нэр дэвшигч)

1. Нэр дэвшигчийн бүртгэл

Овог: <input type="text"/>	Нам, эвсэл: <input type="text"/>
Нэр: <input type="text"/>	Нэр дэвшиж буй тойргийн дугаар: <input type="text"/>

2. Цахим хуудас

/МУИХСТХ-ийн 47.1.1 нэр дэвшигчийн болон нам, эвслийн өөрийн тус бүр нэг цахим хуудас/

Нэр дэвшигчийн вэб сайтын бүртгэлийн мэдээлэл	Тус вэб сайтын байршлын талаарх мэдээлэл (вэб сервер / хостинг)
Домэйн нэр: <input type="text"/> Мэйл хаяг: <input type="text"/> Утасны дугаар: <input type="text"/>	Хост серверийн нэр: <input type="text"/> Хост серверийн IP хаяг: <input type="text"/>

Цахим орчин дахь сонгуулийн сурталчилгаатай холбоотой хамтран ажиллах ажилтны мэдээлэл:

Овог:

Утасны дугаар:

Нэр:

Мэйл хаяг:

3. Цахим орчин дахь олон нийтийн сүлжээний цахим хуудас

/МУИХСТХ-ийн 47.1.2 цахим орчин дахь олон нийтийн цахим хуудас, 47.1.3 бусад цахим хуудас/

Цахим орчин дахь олон нийтийн сүлжээ	Олон нийтийн сүлжээний цахим хуудасны мэдээлэл
	Профайл хаяг: Профайл хаягийн нэр: <input type="text"/> Профайл хаягийн хэрэглэгчийн нэр: <input type="text"/>

<input type="checkbox"/> Нэр дэвшигчийн Фэйсбүүк:	Профайл хаягийн холбоос /URL/: <input type="text"/> Пэйж хуудас: Пэйж хуудасны нэр: <input type="text"/> Пэйж хуудасны дугаар /ID/: <input type="text"/> Пэйж хуудасны холбоос /URL/: <input type="text"/>
<input type="checkbox"/> Бусад олон нийтийн сүлжээ	Бусад олон нийтийн сүлжээний цахим хуудас: Олон нийтийн сүлжээний нэр: <input type="text"/> Цахим хуудасны холбоос: <input type="text"/> Олон нийтийн сүлжээний нэр: <input type="text"/> Цахим хуудасны холбоос: <input type="text"/> Олон нийтийн сүлжээний нэр: <input type="text"/> Цахим хуудасны холбоос: <input type="text"/> Олон нийтийн сүлжээний нэр: <input type="text"/> Цахим хуудасны холбоос: <input type="text"/>

*Цахим орчин олон нийтийн сүлжээний цахим хуудас, цахим хаягийн профайлыг хэвлэмлээр хавсаргах

4. Бүртгэл хийсэн аймаг, нийслэлийн сонгуулийн хороо

<input type="checkbox"/> Нийслэлийн сонгуулийн хороо	
<input type="checkbox"/> Аймгийн сонгуулийн хороо	<input type="text"/>
Баталгаажуулсан	
Овог, нэр:	<input type="text"/>
Албан тушаал:	<input type="text"/>
Гарын үсэг:	<input type="text"/>

СОНГУУЛИЙН СУРТАЛЧИЛГААНД АШИГЛАХ ЦАХИМ ХУУДАСНЫ БҮРТГЭЛ
(Цахим орчны үйлчилгээ эрхлэгч)

1. Цахим орчны үйлчилгээ эрхлэгчийн бүртгэл

Овог: <input type="text"/>	Албан тушаал: <input type="text"/>
Нэр: <input type="text"/>	Мэйл хаяг: <input type="text"/>
Утасны дугаар: <input type="text"/>	Хаяг: <input type="text"/>
Хуулийн этгээдийн нэр: <input type="text"/>	Хуулийн этгээдийн хаяг: <input type="text"/>

/Хуулийн этгээд бол хуулийн этгээдийн нэр, хаягийг оруулах/

2. Цахим хуудас

Вэб сайтын бүртгэлийн мэдээлэл	Тус вэб сайтын байршлын талаарх мэдээлэл (вэб сервер / хостинг)
Домэйн нэр: <input type="text"/>	Хост серверийн нэр: <input type="text"/>
Мэйл хаяг: <input type="text"/>	Хост серверийн IP хаяг: <input type="text"/>
Утасны дугаар: <input type="text"/>	

3. Цахим орчин дахь олон нийтийн сүлжээний цахим хуудас

/МУИХСТХ-ийн 47.1.2 цахим орчин дахь олон нийтийн цахим хуудас, 47.1.3 бусад цахим хуудас/

Цахим орчин дахь олон нийтийн сүлжээ	Олон нийтийн сүлжээний цахим хуудасны мэдээлэл
---	---

<input type="checkbox"/> Цахим хуудас, цахим орчин дахь олон нийтийн сүлжээний цахим хуудас хариуцах ажилтны мэдээлэл:	Овог: <input type="text"/>	Нэр: <input type="text"/>
	Утасны дугаар: <input type="text"/>	Мэйл хаяг: <input type="text"/>
Олон нийтийн сүлжээний цахим хуудас:		
Олон нийтийн сүлжээний нэр: <input type="text"/>	Хаягийн нэр: <input type="text"/>	Нүүр хуудасны зураг хавсаргах: <input type="text"/>
		<input type="checkbox"/> Хавсаргасан
Цахим хуудасны холбоос: <input type="text"/>		
Олон нийтийн сүлжээний нэр: <input type="text"/>	Хаягийн нэр: <input type="text"/>	Нүүр хуудасны зураг хавсаргах: <input type="text"/>
		<input type="checkbox"/> Хавсаргасан
Цахим хуудасны холбоос: <input type="text"/>		

***Цахим орчин олон нийтийн сүлжээний цахим хуудас, цахим хаягийн профайлыг хэвлэмлээр хавсаргах**

4. Бүртгэл хийсэн аймаг, нийслэлийн сонгуулийн хороо

<input type="checkbox"/> Нийслэлийн сонгуулийн хороо	
<input type="checkbox"/> Аймгийн сонгуулийн хороо	<input type="text"/>
Баталгаажуулсан	
Овог, нэр:	<input type="text"/>
Албан тушаал:	<input type="text"/>
Гарын үсэг:	<input type="text"/>